

Seri Paduka gembira kemajuan, perkembangan positif Kuin

BALING 20 Okt. - Yang di-Pertuan Agong, Tuanku Abdul Halim Mu'adzam Shah menzahirkan rasa gembira terhadap kemajuan dan perkembangan positif Kolej Universiti Insaniah (Kuin) yang disifatkan sebagai mercu tanda negeri dalam memartabatkan pendidikan Islam.

Sambil menzahirkan keyakinan terhadap kualiti yang ada pada para siswazahnya dalam memenuhi keperluan industri, baginda turut berharap agar budaya pengajaran berkualiti di kolej universiti itu diteruskan bagi melahirkan siswazah yang mempunyai kualiti kepimpinan dengan akhlak terpuji.

"Kampus Kuin di Kuala Ketil menjadi mercu tanda kepada kejayaan Kedah pimpinan Menteri Besar, Datuk Seri Mukhriz Tun Mahathir dalam memartabatkan institusi pendidikan tinggi Islam di negeri ini.

"Beta berharap, budaya pengajaran berkualiti tinggi diteruskan, selain memajukan budaya inovasi dan kreativiti antara ilmu duniawi dan ukhrawi bagi melahirkan graduan yang mempunyai kualiti kepimpinan akhlak terpuji," titah baginda yang juga merupakan Canselor Kuin.

Titah baginda itu dibacakan Pengerusi Jemaah Pemangku Sultan Kedah, Tan Sri Tunku Sallehudin Sultan Badlishah, selaku Pro-Canselor 1 Kuin dalam Istiadat Konvokesyen Ke-17 kolej universiti itu di Dewan Tuanku Permaisuri Hajah Haminah, Kuin di Kuala Ketil, dekat sini hari ini.

Yang turut berangkat Tunku

Puan Temenggong, Puan Sri Tengku Maliha Tengku Ariff dengan diiringi Menteri Besar dan isteri, Tok Puan Norzieta Zakaria serta Pemangku Rektor Kuin, Prof. Datuk Dr. Sayyid Muhammad Aqiel Ali Al-Mahdaly.

Sementara itu, Mukhriz yang juga Pengerusi Lembaga Pengarah Kuin dalam ucapannya memberi jaminan kerajaan negeri akan terus memberi komitmen tinggi dalam memperkasakan sistem pendidikan yang seimbang walaupun ekonomi negara kian dihimpit dengan pelbagai masalah global.

"Ini selaras dengan aspirasi kami untuk melahirkan lebih ramai ilmuwan Islam yang mampu mengintegrasikan antara ilmu duniawi dengan ukhrawi bagi memimpin masyarakat serta mencorakkan kehidupan berteraskan penghayatan al-Quran dan sunnah.

Dalam pada itu, penerima anugerah tertinggi, Jaizah Imtiyaz Tuanku Canselor, Wan Ahmad Faiq Wan Adnan, 29, sememangnya terkenal mempunyai disiplin yang baik serta kemampuan tinggi dalam bidang akademik.

Namun 'status' itu tidak menjadikan Wan Ahmad Faiq sebagai seorang yang sombong.

Baginya setiap kuliah perlu dihadiri dan ilmu yang ada harus dikongsi bersama rakan-rakan seperjuangan sebagai salah satu teknik untuk menajamkan pemahaman terhadap pembelajaran.

Ternyata amalannya itu berhasil setelah anak bongsu daripada enam beradik yang pernah meraih keputusan 11A dalam Sijil Pelajaran Malaysia

(SPM) mengulangi kecemerlangannya setelah menerima anugerah tertinggi, Jaizah Imtiyaz Tuanku Canselor dalam Istiadat Konvokesyen Ke-17 Kuin di sini hari ini.

"Saya percaya tiada laluan pantas untuk seseorang berjaya. Oleh itu, walau setinggi mana pun pementakan seseorang pelajar terhadap sesuatu isu, pelajar itu tidak mempunyai sebarang alasan untuk ponteng kelas.

"Bagi saya untuk kita mengambil ilmu melalui buku amat berbeza hasilnya daripada menghadap penyarah atau guru. Di situ letaknya keberkatan dalam menuntut ilmu," katanya.

Selaku penerima anugerah tersebut, Wan Ahmad Faiq turut menerima RM3,000 hasil sumbangan peribadi Yang di-Pertuan Agong, Tuanku Abdul Halim Mu'adzam Shah yang juga Canselor Kuin.

Siswazah Ijazah Sarjana Muda dalam bidang Usuludin itu terpilih menerima anugerah berkenaan setelah mendapat anugerah dekan dalam setiap semester dan menamatkan pengajian dengan purata nilai gred kumulatif (CGPA) 3.98.

Sementara itu, Wan Adnan ketika ditemui mengakui, kejayaan anaknya itu merupakan sesuatu yang amat dibanggakan.

"Wan Ahmad Afiq pernah memberitahu yang dia akan kembali mengulangkaji pelajaran setiap kali pulang dari kuliah. Saya fikir itu merupakan salah satu resipi kejayaannya dan sudah tentu saya bersyukur dengan apa yang diperolehnya hari ini," katanya.



WAN AHMAD FAIQ WAN ADNAN (empat daripada kanan) bersama rakan-rakannya dalam Istiadat Konvokesyen Kolej Universiti